



ハ 6
190
7



八和 6
190
7

門
號 190
卷 7



文帝全書內函卷十

目錄

季左卿序

本願經

正心開化品

正心靈應品

正心報應品

文帝全書

卷十

目錄

文帝全書 卷一
成則鬼神欽仰。天地寧謐。老者得壽。少者得養。國土清
平。五穀豐熟。信有如天尊所云。又何劫之不消乎。世之
人以予言爲序經也可。卽以爲誦經之法亦可。雍正甲
寅季夏望日文昌左卿季雲飛降撰

本願真經

文帝全書內函卷十

文帝全書內函卷十

古鼎劉廣恕

義陵劉體恕無我彙輯

古渝金本存全訂

古鼎劉悟誠

仁和關 槐柱生校定

太上消劫梓潼本願真經

開經偈

至矣聖賢心。廣宣金石言。推本性天內。守約不事煩。
方寸果崇修。妙境許攀援。玉章頻轉導。期透本來元。

剛堅明一悟俯首自逢源。皈依啟教祖。內照寂無喧。

正心開化品上

爾時元始天尊在清微天宮。黃金闕內。會諸天帝君。與無極聖眾。昇玉華寶座。放大光明。照諸世界。觀見眾生。遭值劫運。受無量苦惱。宛轉塵寰。輪迴生死。慨爾嘆曰。民哉民哉。誰使而然哉。是時有一真人。名曰慈濟。從法座起。越班而出。長跪道前。白天尊言。賤臣不德。仰叨道蔭。得離斯苦。昨觀玉皇尊帝。檢校圖籙。推定劫運。勅北陰黑煞。多目鬼厲。及諸天魔王等眾。下巡人間。興動兵

戈。流布瘟疫。殺戮生民。萬萬億數。俾諸世人。靡有遺類。今觀眾生。父子兄弟。夫婦男女。肝腦塗地。號泣悲哀。莫能相保。繼以天災大行。鬼現白晝。間獲免彼。終莫此逃。未審此諸眾。生曠劫以來。造作種種。何所違戾。而獲是報。可不悲歟。可不痛歟。伏願慈悲。示以未悟。天尊告曰。此諸眾。生自往劫來。不敬三寶。不孝父母。邪淫貪愛。姦詐嫉狠。造種種罪惡。日熾日滋。是故玉帝。論定劫運。更變世人。雖可悲痛。亦其自取。爾時慈濟真人。暨諸聖眾。各稽首而白天尊言。臣等卽是思惟。心大不忍。咸首感

文府全書 卷十
額力不能救。惟願天恩發慈悲心。開方便路。垂一金臂。援其焚溺。庶使人道不致類絕。臣等敢冒死謹言。於是天尊撫几高抗。澄神默坐良久。答曰。邇者蜀有大神號曰梓潼。居昊天。之佐。齊太乙之尊。位高南極。德被十方。掌混元之輪。廻司仕流之桂。祿考六籍事。收五岳形。歷億千萬劫。現九十餘化。念念生民。極用其情。是以上帝授之如意。委行飛鸞。開化人間。顯跡天下。蓋此末劫。實未可除。若欲消之。此神其可。吾當爲汝等名之。俾其救度。勿使類絕。於是慈濟真人及諸天聖衆再拜禮謝。復

位。於是天尊命持幢玉女。向不驕樂天。名之者三。忽梓潼帝君擁五色雲霞之氣。自西北至。雍容雅步。再拜而前。白天尊言。今日喜慶。興此法筵。臣貪於行化。以致後會。恭望天慈。特賜原宥。天尊告曰。夫民受天地中生。自陰陽內化。五行範體。二氣結形。而不知人身難得。樂土難生。乃貪婪姦詐。莫知紀極。以致劫運適逢。兵戈競起。疫癘流行。水火漂焚。悉皆由也。今諸帝君天上地下。無極聖衆。咸請於我。願消此劫。故特以畀汝。汝其勉之。爾時梓潼帝君拜謝。奉旨欲退。天尊重告曰。帝子。此諸末

劫運數浩大。汝今消之。何道而可。梓潼帝君復再拜而前。白。天尊言。臣自劫劫中。萬失本身。謫在蜀地。兢兢惶惶。懼不稱職。方切思過。乃誤天恩。臣謹維思。消除此劫。先正人心。爲人子者。訓使知孝。爲人臣者。訓使知忠。訓兄弟以友恭。訓夫婦以和順。訓居上者。使待下以情。訓治事者。使處心以公。率而行之。或者可以少弭。於是天尊乃垂盼背之容。而稱嘆曰。奇哉帝子。憫念衆生。說是因緣。心得開悟。若諸世人。推行不已。則可以消除劫難。興國太平。人享高壽。物遂本性。五穀豐熟。歌謠滿路。一

或反之。則兵戈疫癘。頻仍相藉。橫尸遍野。枯骨成山。而人類絕矣。子其勉之。於是梓潼帝君拜謝。復擁五色雲霞之氣。自西北而退。爾時慈濟真人。聞是說已。歡喜踴躍。卽於座中。以頌讚曰。堪嗟爾衆生。姦詐復貪嗔。營營日滋熾。擾擾不知懲。致遭末世劫。人類將沉淪。於是元始尊。憫念諸有情。欲救末劫苦。爰命梓潼君。筆中顯三昧。秩秩先正心。塵迷能導引。福祿總來并。是時慈濟真人。說是頌已。四衆歡喜。異口同聲。歎未曾有。

正心靈應品中

道言。元始天尊在玉華座上。收斂光明。澄神默坐。瑤壁
輝映。真氣包絡。鐘鼓迭奏。仁風交暢。道意微密。暄然如
春。一切金仙四衆。八部幢幡寶蓋。侍在側焉。爾時元載
孔昇。天主濟沉拔罪真人。東岱嶽府君。各從座起。長跪
道前。白天尊言。臣等往劫何修。獲與法會。親炙道語。心
竊欣感。然臣等愚蒙。聞是經說。雖已歡喜。終竟未達。切
謂人心不正。致罹此劫。自非天尊垂大金臂。放大光明。
展大神通。勅諸巡世神祇。各令復位。則或者他道似未
爲急。今大劫已至。運難豐浩。而九天開化。方正人心。臣

恐其緩。伏望天慈。示以未悟。於是天尊浩然長嘆。而告
諸真衆曰。嗟乎汝等。尙未達理之本耶。夫人之生。善性
根焉。孝弟衷焉。四端具焉。五行範焉。忠信胚焉。和遜傳
焉。所爲人也。非比草木禽獸之爲類。凡形肖相似。皆一
同之。及世道淪降。人心不古。機巧姦僞。貪妒狠亂。種種
不善。踴躍爲之。是以見三寶而不敬。對三光而無禮。呵
風罵雨。怨天尤地。待父母如同路人。視兄弟如見仇敵。
責人常詳。待己每恕。見人有善。掩之不及。則毀之無所
不至。見人有惡。喜而慕之。則效之惟恐弗勝。富貴者驕

奢淫佚。傲慢賢能。褻瀆師長。昂首濶步。視貧賤如履草芥。不能修種。不行陰騭。暴殄天物。中市罔利。了不知止。貧賤者。諂諛貪嗔。怨咎鬼神。不知前世因果。不能安貧守己。邪淫偷盜。犯分干禮。終莫自悔。是以惡人滿世。邪鬼橫行。讒慝交進。謗讟竝興。政治乖舛。人民困苦。山川告匱。鬼神不寧。怨氣鬱結。上薄太空。世道至此。寧得不變。所以檢校圖籙。運合數周。推此大劫。日月薄蝕。陰陽乖戾。魔鬼巡世。亂民迭興。兵戈疫癘。頻仍不已。命苟彼逃。終莫此免。枯骨成山。血流若水。殄滅人類。勿使遺種。

若欲救之。豈易爲力。吾故命梓潼君。開化九天。飛鸞救世。俾諸世人。洗心滌慮。咸臻善道。爲子而能孝其親。爲臣而能忠其君。爲兄弟而克友克敬。爲夫婦而克和克順。居上待下者。必以情臨。政處事者。必以公不貪不妒。不奸不僞。習此不已。化成天下。則鬼神欽仰。天地寧謐。老者可以得壽。少者可以得養。國土可以清平。五穀可以豐熟。末世可以返古。豈惟末劫獨不消乎。吾若放光垂臂。雖可救之。然人心不正。其何能救。故不若人心既正。大劫自除。諸巡世神祇。方欽仰畏避。豈敢肆毒汝等。

各宜諦心恭聽。勿生他慮。於是元載孔昇天主。濟沉拔罪真人。東岱嶽府君。皆歡喜作禮。默然復位。爾時天尊復告四衆曰。我今再剖因緣。汝等各宜諦聽。人爲萬物靈心。爲一身主。沉沉靜靜。不愆於慾。不雜以僞。無慮無思。發而爲言。溫和辭讓。發而爲行。忠正端直。其於親不期孝而自孝。其於君不期忠而自忠。其於兄弟不期友敬而自友敬。其於夫婦不期和順而自和順。不厚責於人。不徇物以私。率性而行。舉皆中道。何者容心。故其國清平。其人安泰。其世上古。今末世凡人。勉強遵守。不違

不戾。心心不退。念念不忘。其獲福亦可如是。豈以大劫持此而不消乎。於是天尊說偈曰。靈哉一點。不擾不驚。無思無慮。至聰至明。天理昭著。善性根成。一雜以僞。五體摧傾。能自歸正。百福來并。敬之慎之。大衆齊聽。於是天尊說偈已。諸天真衆。無鞅仙神。嶽瀆神祇。歡喜踴躍。歎未曾有。

正心報應品下

保和應化真人。卽於道前。稽首而言曰。未審此經消劫之外。有何功德。伏望天慈。爲四衆帝釋。諸天神仙。嶽瀆

祇靈。天上地下。及未來一切衆生。廣說利益。於是天尊告保和。應化真人曰。善哉。若諸國王帝主。宰輔大臣。奉持此經。皈依此道。躬行不替。教化天下。自然風淳俗美。政善民安。五穀豐登。萬物熙遂。若諸世人。平居無事。至心滌慮。精加轉誦。自然父母長壽。子孫榮貴。家道昌隆。身體康健。凡有所求。種種如願。若復有人。或入山林。或入江海。遭遇惡風。逢值毒獸。但能懺悔。存念此經。自然山神衛護。河伯維持。猛獸自退。風浪頓止。若復有人。或在軍陣。或遇冤家。但能懺悔。存念此經。自然惡人善解。

凶器不逢。終不害己。安穩如常。若有婦人。或臨產厄。或求嗣息。但能懺悔。存念此經。自然所產。平康。生福德。男女聰明智慧。爲人尊貴。若或有人。爲諸神廟。轉誦此經。是諸鬼神。當脫鬼趣。轉增天福。又有道士。至人。善男。信女。開闢淨室。更着新服。畫九天主宰真像。香花燈果。淨水供養。滌去凡思。端心正坐。持誦此經。是其左右一切鬼神等。或有聞者。卽離鬼趣。登證仙果。一切餓鬼等。或有聞者。脫饑渴苦。受度南宮。一切畜生等。或有聞者。脫畜生苦。復歸人道。一切草木。承此經者。已枯使榮。轉更

文帝金書 卷一
茂盛。飛潛動植。胎卵濕化。一切有情。咸遵道化。又此經所在。及持是經人。當有十方飛天大聖。救苦真人。金剛力士。神仙兵馬。金睛猛獸。無鞅數眾。常來擁護。一切功德。說不可盡。於是保和應化真人。稽首上白天尊言。此經功德。眾咸聞之。若諸世人。或有疑惑不信。妄生誹謗。不擇淨案。便將安置。不持齋戒。便將轉誦。未審此諸罪輩。當得何報。伏願天慈。再示未悟。爾時天尊言。曰。噫。子今所叩。豈不異乎。此經功德。不可度量。其報應亦不可具述。若諸世人。敬持遵奉。疑惑誹謗。獲福獲罪。各有輕

重。若廣說之。凡流邪見。反起疑貳。我今說經。止救末劫。世人疑信。一聽自然。性命禍福。豈可戶曉。但願世人事親者。當爲心孝。毋爲面孝。事君者。當爲心忠。毋爲面忠。處兄弟。則當心友。心敬。毋面爲友敬。處夫婦。則當心和心順。毋面爲和順。待下者。毋面似至情。而心實不情。臨事者。毋面似至公。而心實不公。若能遵行此道。則雖疑惑誹謗。猶信也。若不能遵守此道。則雖齋戒敬誦。猶未信也。善者積善。惡者積惡。積之既久。天地鬼神。臨之質之禍之福之。皆自然也。吾何言哉。於是保和應化真人。

文帝全書 卷一
九
及諸天仙衆同聲稱讚。而說頌曰。大哉渺渺玉皇中。推較河源俱此劫。殺戮生民億億衆。頂禮至尊求解滅。於是天尊發慈悲。九天開化普俱雪。但教人人各正心。疑信從教衆生竭。我今稽首謝慈尊。萬萬生靈俱頂德。爾時保和應化真人暨諸仙衆。說是頌已。稽首天顏作禮而退。

文帝全書內函卷十一

目錄

救劫經

警戒章第一

孝感章第二

士行章第三

日用章第四

官守章第五

道釋章第六

從侍衛森列。樂音震天。蒙天帝令爲太玄無上上德真君。同中書門下平章事。上主三十三天仙籍。中主人間壽夭禍福。死生貴賤。下主十八重地獄輪迴。拜命訖。空中大震七聲。天旋地轉。吾以劍一指。天地停車。日月停輪。頃刻間。紫雲上衝。黑氣盤結。有二童子以善惡簿進。曰：寅卯而後。劫運可駭。承旨豫定善惡。敢以簿進。吾閱善簿。得忠孝功德陰隲。修行者若干人。閱惡簿。得十惡五逆。臣民官吏士農工商僧道雜流。爲惡若干人。吾愍劫運之臨。世人造惡。無有窮已。今遣十惡大魔三百萬。

飛天神王三百萬。神兵神將一千六百萬。以五道雷神主之。收取惡人。又大風大雨大水大火大疫並作。以收惡人。用充劫運。罪罰不追。深可哀憐。吾今爲度脫衆生。私露天機。畧具善惡簿中。曾有功過者。以爲生人警戒。今勸世人。每日侵晨。持誦救劫經。陰隲文。竝太上感應篇一遍。以消罪愆。持誦者。要人以善惡自反。知法知戒。故能消罪愆。非徒口誦之也。先當遵此六章修行。庶持念聖號靈篇。得以感應如此。則自然福祿無量。子孫榮昌。金車入門。仕宦卿相。若不遵此六章修行。徒口誦經。欲免罪愆。名曰瀆天。其罪尤重。

愈不可解。吾今降下此經。流傳於世。所在之處。以三千神兵衛之。其有誦讀此經而不信受。與前信受後有悔心者。仰飛天大神。即時收取。以充劫數。如有祕藏此經而不傳者。其罪惟均。各宜省悟。

天下通行警戒章第一

此章雖通行警戒。而士居四民之首。官尤百姓之宗。

更當敬凜。

真君曰。哀哉。今世之人。子不孝於親。弟不敬於兄。下不順於上。婦逆於舅姑。弟子凌師長。士虧實行。官恣貪謀。農趨末作。工競浮華。僧道誑俗。自毀真教。罪罰不遠。深

可哀憐。各宜遵吾警戒。勇猛修行。以逃劫運。

天下通行孝感章第二

真君曰。人之立身。以孝為本。東京趙居先。父年九十一歲。母年九十四歲。性皆嚴急。居先夫婦。侍奉勤謹。孝行克諧。每夕焚香。為父母祈禱。三尸上奏。天遣飛天大神。逐日監察。見其心專意一。孝行動天。七子三壻。皆列殊科。居先身證仙界。茂州黎瓊。棄父貪淫酒色。三年淹母殯者五載。被雷焚之。徽州李氏女。名善瑜。適葉元贊。長子年三十。自十八侍舅姑。極孝。家貧。已雖饑寒。

凡飲食不敢嘗啖。以奉舅姑。舅姑病甚。家貧不能召醫。自爲祈告天地。願以身代舅姑。適遇三官巡察。空中聞之。奏聞玉帝。奉旨加其舅姑壽一紀。仍賜錢八十萬。注各祿籍。二子賜品官。後一歲。一旦門未啟。忽見廳上金玉滿堂。變易果得錢八十萬。其鄰居秦氏女。年二十。恃其長舌。抵觸舅姑。李氏嘗勸之而不聽。李氏受錢日。秦氏爲雷火焚燒。善惡之報。昭然可畏。

天下通行士行章第三

真君曰。吾一十七世爲士大夫。未嘗虐民酷吏。今人衣

冠紛紛。日讀其書。恃其文章。而行己法度。孝行陰功。畧不加意。或兄弟分爭。或宗族相毀。或夫妻反目。或父子憎嫌。或倚恃富勢。而欺凌小民。或矜恃才能。而欺侮前輩。或口誦佛老。而薄於父母。或貌敬天地。而中萌欺詐。或教人爭訟。而破散人家。或巧言妄語。而助人之過。或破人婚姻。或毀謗同類。或播人是非。或埋藏陰毒。此等罪犯。難可解雪。倘或回心。庶幾免咎。衢州范元之。素貧。盛暑江浴。拾得金銀一袋於岸。歸謂子曰。世人以財爲命。萬一此人失此。自經於溝壑。枉喪性命。冀旦父子

攜於岸待之。果見一婦悲號而至。元之詰其故。曰。夫坐獄當死。易田得銀。至此失之。元之卽以還之。婦與分。亦不肯受。旣而鄉里多薄之。謂其不能經營生理。空自守貧。元之笑而不答。次年父子登第。至今十二世爲二千石。瀘州李挺先。才高自爲第一。以兄弟參商。好毀人婚姻。發人私密。遂降其籍。信州林茂先。才高過人。已捧鄉書。家極貧。閉戶讀書。鄰家巨富。婦厭其夫不學。私慕茂先。才名夜奔之。茂先呵之曰。男女有別。禮法不容。天地鬼神。羅列森布。何可以此污我。婦慙而退。茂先次

舉登第。二子皆登第。見聞者各宜悛戒。

天下應世日用章第四

真君曰。凡今之人。毒惡殘忍。巧詐不常。難爲指名。姑示一二勸戒。杭州王用先。家貲百萬。置大小二斗。大小二秤。較量出入。以欺陷人。止及十年。遭禍被刑。家財破散。子孫作丐。福州福清縣文紹祖。與柴公行議親。旣問名。柴女忽中風。紹祖欲更之。其妻大怒曰。我有兒。當使其順天理。自然久長。悖禮傷義。是爲速禍。大斥紹祖。卽娶柴女歸。次年紹祖子登第。柴女瘋亦痊。生三子。皆

文府全書 卷二 五
登第。何元益與趙明夫議婚已定。而趙女失明。家計寥落。元益易其親。與單子文爲婚。次年父子俱喪。明趙女適士人葉惟先。惟先登第三典大郡。階州孫仲可。欺奪寡婦之田。繼與通奸。中年聾盲。子孫齟齬。建州楊進。多廣田園。百計吞併。交易不明。至少子鐘仲不肖。三年破敗蕩盡。拘惡簿。元秀家財四十萬。生子四人。其餘諸妾所出。不問男女。竝瘞埋之。一日夢見數十輩。來追殺人賊。元秀大驚起。兩手兩足已爲牛蹄。輾轉於牀。大叫三日。頭斷而死。陰府申聞。天曹帝大怒曰。性根

不壞。方得人身。天神誦章。始離母腹。愚人不禁情慾。嬰兒有何罪愆。揆以正條。倍於故殺。殺人償命。理所應然。天曹牒下陰府。判斷元秀受罪外。拘囚地獄。在生四子。注籍刑名。四十萬財。沒入官府。近者四方奏牘。類此者衆。下酆都別置一籍。收錄此等名字。差北方飛天神王。統領神兵。巡行天下。有似此者。卽許便宜施行。不待事終。赴十獄考鞫。真君曰。人子不孝。自有天條誅戮。無罪殺兒。是殺天下人民也。故元秀身墮地獄。四子犯刑。家財沒官。且人厭多兒。何不節慾。乃敢殺人不顧。今世之

如元秀者。何地無之。吾觀鄴都城中。以此受罪者。不可勝數。各宜省悟。不可自取天譴。若元秀永囚地獄。萬劫受罪。子孫受刑。可不悲夫。禍福無門。惟人自召。

天下通行官守章第五

真君曰。士之居官。以忠爲先。今世大異。上而卿相。下而一命。賄賂公行。公道不立。皇天震怒。何況侵民膏血。自肥一家。扼人噤喉。自謀進取。不公不法。不仁不義。快一勝於目前。結無窮之冤業。劫數來時。福力盡處。果報昭彰。若速悔心。猶可免戾。故顯官子弟。多不振。勢位之家。

多破殘。上天之報昭然。人苦不自覺耳。葉知遠。知嵐谷縣。壽限將終。其春首。知遠之子。與一巨室同謀。私受財物。妄入人罪。誣以劫掠。其勢炎炎。罪及千家。知遠覺其情。竝其子申於朝。力爲明辨。遂免千家之罪。城隍申奏。知遠延壽一紀。一年內。妻妾生二子。皆榮顯。然則善簿所記。存心如知遠者。有何人。知遠若私其子。以害民。必自受責。其禍當何如。今遣童子三百萬。巡察四方。官吏善惡。各行果報。

天下通行道釋章第六

真君曰。僧道出家。名爲離業垢。今世可駭。纔入道場。逆料施利之多少。加減法事。或醉酒飽肉。或畜妻私寮。穢德彰聞。有負上聖救世之心。如此等類。歷劫不赦。通州海門縣。景覺之。有子名佛孫。九歲出家。名祖惠。二十八爲長老。濫稱禪師。而不明本性。罪惡又多。其伯景識之。有女名蓮真。年十八。出適與其夫。失歡而回。故家僧祖惠出入伯氏。時或遇宿。與蓮真通淫。其伯以一家無間。初不知覺。僅及兩月。司命大怒。徑奏上蒼。適遇雷公奏事。奉命碎祖惠屍首於通衢。拷其魂於酆都地獄。萬

劫受罪。不舍晝夜。又以雷火三遶蓮真。三焚之。不令死。大書其背曰。亂倫怪獸。求生不得。求死不得。如是三年。方令入地獄受罪。配入禽獸道。識之夫妻。以閨門不肅。各減壽一紀。惡疾而終。蓮真之姑。中間知覺。私受二百貫。大風剗其目。截其鼻。旦夕自稱曰。我黨同亂倫怪獸。使我至此。伽藍土地。以失申奏。亦拘繫獄府。日受鞭笞。責以重罰。黑氣二十四。其中一道。是僧道淫穢。褻瀆上真事。一道。是世人殺所生男女。冤氣衝天。其他皆罪惡所積。今通都大邑。有敗禮之家。或至親。或宗黨。旣出家

者。往來私家。男女雜處。無間。不知僧道壞俗。俗壞僧道。亂上天人倫。背至尊教法。天地震怒。罪入惡籍。侮滅三教。如此等罪。何時可懺耶。今遣飛天大聖。統御鬼魔。四十萬。以雷公主之。巡行四方。日夕申奏。如有亂教法者。仰雷公便宜施行。夫道與佛。初無負人。而人自負之。壬申歲。世人以誦經修行。證道成佛者。七千人。蓋自清心寡慾。先修人事。不犯人倫科戒。積德累功。諸惡不作。然後得此。今勸世人。若能遵此六章行之。乃可免禍。而得福。背吾所言。天條不赦。

真君曰。混沌未分。吾統天地人之道。自太極判。吾與大道俱顯。吾上則替天行道。下則濟度萬民。故證斯果。吾統天地人。何神不攝。何事不該。何物不佑。何罪不罰。何祈不應。何劫不定。吾哀世人。造惡不已。或心生。或口語。或教人。或自作。晝則不足。夜以繼之。今大劫可駭。不生悔心。不覺不知。流浪苦海。生而害身滅家。死後萬劫受罪。作禽獸身。昏昏默默。永無出期。深可悲哉。每家各宜書寫此經一帙。日夕瞻視。依此六章修行。每日侵晨。誦四大天尊聖號。及感應篇。行之二年。萬罪消滅。行之四

文帝聖書 卷二
年百福皆集。行之七年。子孫賢明。榮登科第。行之十年。壽命延長。行之十五年。萬事如意。行之二十年。子孫爲卿相。行之三十年。注名仙籍。行之五十年。天神恭敬。名列仙班。不依此六章。加意修行。或作或輟。今日行。明日廢。人事既乖。心田日暗。雖口誦經。而其心不悟。是爲瀆天罪。不容赦。欽哉。一違吾言。斷不容恕。詩曰。爲官清正。強修道。愛老憐貧。勝出家。作事莫瞞天地眼。自然心似白蓮花。又曰。行藏虛實自家知。禍福因由更問誰。善惡到頭終有報。只爭來早與來遲。閒時檢點平生事。靜坐

思量日所爲。意馬心猿當繫縛。自然天地不相虧。又曰。心不明。來點甚燈。意不公平。看甚經。大秤小斗。吃甚素。不孝父母。齋甚僧。妙藥難醫。冤業病。橫財不富。命窮人。利己害人。終損壽。積善修身。蔭子孫。人惡人怕。天不怕。人善人欺。天不欺。暗中陰騭。分明有遠。在兒孫。近在身。說話莫談他人短。自短何曾說與人。生事事生。君莫怨。害人人害。汝休嗔。欺心折盡。平生福。行短天教。一世貧。爐中有火。休添炭。扇遇涼時。莫使風。立心若不行。方便念盡。彌陀總是空。又曰。饒一着。添子孫之福。壽退一步。

巧詐戒六

忍親戒七

棄子戒八

焚焰戒九

暴性戒十

本朝

日

文帝全書內函卷十二

文帝全書內函卷十二

延嗣經序

孟子云。不孝有三。無後為大。善哉是言也。知斯言之為要。則知延嗣經之不可少矣。蓋天之生機。本自不息。而人乃有嗣有不嗣者。以其人之善惡有殊。而天之生機因而異耳。然歷觀乏嗣之人。半屬痴迷不悟。溺於聲色貨利之場。而於立心行己之要。置若罔聞。於是玉皇大天尊哀憫凡愚。爰命帝君著斯經以垂世。俾人於捧持之際。猛然深省。改其向日之非。以歸於是。將一心悔悟。

卽格天心。心旣可以對諸天地。而天地之生機卽在我矣。又何慮嗣之不延乎。倘僅以拜誦了事。而於經中妙義。徒口誦而弗心維。則我帝君雖甚慈仁。究亦無如之何也。惟願觀斯經者。咸以吾言爲藥石。共樂休徵。則幸甚矣。時雍正甲寅孟冬朔文昌右弼天聳真人降撰

文帝全書內函卷十二

古鼎劉廣恕

義陵劉體恕無我彙輯

古渝金本存全訂

古鼎劉悟誠

仁和關 槐柱生校定

文昌應化張仙大真人說注生延嗣妙應真經

開經偈

頂禮上界尊。皈依先天祖。人間大不孝。無後爲最苦。
 今持妙應經。種種慙無補。惟願憫微忱。錫我蒸嘗主。

文帝全書 卷二
爾時玉皇大天尊。在浮黎空境。鬱羅洞天。觀無極世界。見無量衆生。有富貴康寧。子孫繞膝。金紫肩摩者。亦有業累萬金。榮敷數世。後來繼世不續。宗祀無承者。有受貧窮苦楚。孤獨零丁。形影子立者。亦有家無擔石。地鮮卓錫。後來子姓昌大。數葉不衰者。萬有不齊。是雖前世來因。亦由今生造作。天尊劑量。大生愍念。哀此犛獨。乃降玉音。宣名歷劫。遐邇至真仙衆。雲駢鶴馭。浮空而至。俯伏瑤臺。稽首聽命。維時張仙真人。越班而出。長跪白言。天尊大聖。諸天之父。衆真之祖。恩覃萬類。澤沛九壇。

上天下地。往古來今。色色形形。生生化化。無有紀極。無有盡藏。今此下民。老而無子。孽由己作。悔不可追。伏願廣佈好生之德。照原無後之愚。宥其往愆。示之生道。使人人有後。代代相承。臣不勝懽幸。不勝懇願之至。天尊言。蠢爾衆生。莫知至道。道生天地。天地妙合。二五儲精。成男成女。至秀至靈。盈天地間。若有知。若無知。若有情。若無情。皆從不有中。有不形中形。惟人最貴。尤獨得靈。反罹孤絕。其何以故。吾今宣說。爾當諦聽。天尊言。人生在世。乾父坤母。陰受陽施。氣稟清濁。男女異姿。賢愚貴

文帝聖書 卷十二
賤造物攸司。厥初生民。媾遇有時。天然節制。準以信期。多生男子。聖哲胚基。所以聖人。不屏男女之慾。惟循人道之宜。降及後世。情竇日開。風氣日漓。非時淫縱。任意妄爲。元精耗竭。欲熾神疲。或裸露星月。或觸穢神祇。或三元五臘。或四絕四離。或晦朔弦望之日。或疾風暴雨之時。不知禁忌。大則絕嗣。生亦愚天。更有妻不和順。內多嫉妒。妾媵不容。以致滅宗。不孝之罪。上與天通。似此衆生。太上不宥。亦有夫婦於婚配時。或犯咸池。或坐華蓋。或罹三刑。或招六害。孤陰寡陽。天羅地網。命宮所載。

嗣息艱難。是雖氣數之適然。亦或天心之有在。於是張仙真人。領聞玉旨。作禮長跪。白言。天尊大聖。天尊大慈。廣度衆生。說是因緣。臣伏維思。若此衆生。無有嗣息。皓首何依。空悲日暮。舉目誰親。病來疇顧。獨對孤燈。滄淚交注。太息呼天。天高難訴。一旦無常。空歸泉路。骨肉未寒。家資殘破。柩返夜臺。誰歌薤露。誰繼蒸嘗。誰承封樹。惟願哀憐。屈爲普度。天尊言。希有真人。善哉善哉。爾今名高玉籍。位正瓊宮。上應張宿。典司化權。佐南斗而注生。判桂祿以翊運。尋方顯化。行著崇勳。今以哀憫心。念

未來世一切無後衆生。慇懃啟請。吾特演此妙應真經。若有善男信女。欲求嗣息者。能於二月初三日。及每遇朔望。本命甲子庚申等日。持齋虔禮。捧誦此經。自然居室權和精神完暢。祥光馥郁。生氣氤氳。當有九天鑿生高元帥。招神攝靈。篤生佳胤。比及生產。太乙在門。司命在庭。或有觸冒。或有凶厄。虔誦此經。即得九天衛房聖母元君。陰空抱送。臨盆有慶。子母無虞。嬰兒在於襁褓之中。爲父母者。有能考據五蒸十變之期。焚香祈禱。持誦此經。即得五臟六腑。長養和平。胎毒潛消。痘疹稀少。

關煞不侵。如欲聰明智慧。壽命延長。本命生辰。宜誦此經。諸所饒益。福德無量。爾乃神遊宇內。遍歷十方。爲人演說。佑啟善良。鍾奇毓秀。遂生英豪。綿綿瓜瓞。螫螫蠱斯。爾乃福德勝他。福德諸天聞已。衆真咸悅。於是真人再拜受命。弘宣十戒。廣化愚蒙。

一戒宰殺之惡

印人杜章。躬親烹割。膾炙不離。貧無資身。屠劊就食。取過命之錢。卽爲操刀。見飛走之物。遂萌殺心。所生五子。手無一指。章復病癩。體無完膚。陰爲神使。自揭瘡痂而

食更以指染膿血而自吮之。以爲嗜殺者報。若人知此惡。悔心誓永戒。玉皇大天尊赦消一切罪。

二戒竊盜之惡

節孝婦楊靚中。適寒士雍有章。章亡姑老。婦矢不他適。斷髮毀容。女工給養。姑死禮葬。鄰里助金。有盜者竊之而去。當爲陰兵執於市。自稱我竊楊節婦物。當悉還彼。復自舉手向口。十指齧嚼俱盡。以爲盜竊者報。若人知此惡。悔心誓永戒。玉皇大天尊赦消一切罪。

三戒酷取之惡

蜀江王仔。承檄監督。強民倍課。其主先夢仔生牛尾。產於田氏之家。隨果變爲牛。益昌馬謬。出郡督錢。必期多得。民甚苦之。號曰馬刷錢。一夕暴病而死。忽聞棺中有聲。啟視之。已變爲猪。此爲酷取者報。若人知此惡。悔心誓永戒。玉皇大天尊赦消一切罪。

四戒淫污之惡

李登。少年首領鄉薦。後屢不第。乃求法師葉靜。代查桂籍。歸語登曰。籍載汝應十八歲魁鄉薦。十九歲作狀元。三十二歲位至右丞相。因得舉後。窺鄰女張燕娘不諧。

而繫其父張澄於獄。後於長安邸中淫一良人婦鄭氏。而成其夫白元之罪。又盜鄰居王驥家室女慶娘。爲惡不悛。已削籍矣。終身不第。登聞之失色。一夕愧憾而死。此爲污淫者報。若人知此惡。悔心誓永戒。玉皇大天尊赦消一切罪。

五戒口舌之惡

龜城祝期生。有口才。日習汗下。譏訕善良。謗富侮貧。攻發陰私。暴揚人過。教人詛訟。訶詆幽冥。一日自以其手探舌出。復以指爪犁之。涎血淋漓。宣告諸人曰。口業莫

作。舌枯而死。此爲口惡者報。若人知此惡。悔心誓永戒。玉皇大天尊赦消一切罪。

六戒巧詐之惡

東郭黎永正。以梓匠爲業。因計日值無幾。乃作折底隆梁之斗。可減升勺。又作空中接絲之秤。以任重輕。圖取倍值。夜夢神示。撻警而不改悔。尋瞽雙目。妻棄他適。二子亦盲。手指復殘。骨節零落。行乞於市。遍暴已惡而死。此爲巧詐者報。若人知此惡。悔心誓永戒。玉皇大天尊赦消一切罪。

七戒忍親之惡

蜀中江王千。其父母買香板以自備。千以杉板易而貨之。尋又以株板易其杉板而復售之。及父母死。千更畱其株板。而以松板葬之。千當被雷擊死。而倒植其屍。其子哭而扶屍。亦爲雷擊而擲於五里之外。洎復回。見父屍依前倒植。凡兩瘞皆然。又梓潼庠生羅鞏。欲應鄉試。中途夢神人告語曰。汝已獲罪天曹。亟宜還鄉。前程事不必問也。鞏叩以獲罪之由。神曰。子無他。爲久停父母之柩而不葬耳。鞏曰。家有兄弟。何獨罪鞏。神曰。以子習

禮義爲儒者。當任其咎。其餘碌碌不足責也。鞏旣悟。治裝卽還。中途而卒。此爲忍親者報。若人知此惡。悔心誓永戒。玉皇大天尊赦消一切罪。

八戒棄子之惡

苴饒富戶張千十。凡租其田而食者八十餘家。先授田之日。約有男子力能耕穫者畱之。後有所生。斷不容畱。率以爲常。千十有二子。長者廢疾。次子三歲有癩。醫卜巫禁皆不能治。動輒數日不蘇。一夕其子自言。棄人之子而愛己子。惜其冗食而輕其命。其諸佃之棄其子者。

已四十餘命矣。俱訴於冥。今率汝子而同死也。言畢而死。千亦隨斃。嗣遂絕焉。此爲棄子者報。若人知此惡。悔心誓永戒。玉皇大天尊。赦消一切罪。

九戒焚焰之惡

劍南民李轅。孝於母。一夕有客投宿。轅方烹雞。客以爲相饋。喜形於色。少頃食至。乃脫粟飯也。客不舉箸。轅謝曰。家有老母。病起思肉。適之司晨。不及供客矣。客赧然揚袂而出。夜闌乘風。縱火以燼轅。居火熾。轅負母而出。仰天號泣。忽反風吹焰。燎客鬚髮。迷仆火中。自言俠士。

蒲光度。亡命流離。今卽死。不作無名之鬼。遂斃於火。此爲焚焰者報。若人知此惡。悔心誓永戒。玉皇大天尊。赦消一切罪。

十戒暴性之惡

北郭富民王尙忠。五十無子。性益險急。妾媵小過。輒鞭笞之。或窘辱之。或轉易之。繼子違教。卽責逐之。遇一長者。語曰。子欲求子。當寧心改行。周貧濟急。憫孤容過。自養寬和。三年之後。必產佳胤。忠警改悔。葬貧人父母。五十餘喪。成貧人男女八十餘婚。三年舉子。取名神保。長

登仕籍。爲改過遷善者報。此性暴之惡。尤當戒也。若人知此惡。悔心誓永戒。玉皇大天尊。赦消一切罪。天尊聞彼真人宣說十戒。生大歡喜。傳諭衆真曰。如是如是。乃加真人金闕昊天太師。糾察三界。兼司四方禍福。真人禮謝畢。卽分遣功曹。隨處應變。爲國宣勞。扶鸞降筆。垂示衆生曰。咨爾有衆。聽予格言。毋欺天遠。毋謂神幽。毋言暗室可欺。毋道明庭不畏。毋可一念忘乎父母。毋使一事昧於倫常。毋凌孤寡。毋侮老成。毋取不義之財。毋淫非己之色。毋厚結他人。而親戚陌路。毋泛交。

異姓而兄弟。鬩牆。毋恃己長。毋攻人短。毋立身不正。以曖昧貪饕爲能。毋立心不臧。以機巧奸詐爲勝。毋面譽背非。而苟合於人。毋口是心非。而不容於物。毋外貌慈祥。徒巧言而善色。毋中情狠暴。好潛賊而陰謀。苟負吾言。難逃天憲。或覆滅宗祀。或殃及子孫。惟有敬惜字紙。亦可回格天心。果報昭然。在人耳目。如瀘州楊百行。坐經文而舉家害癩。昌郡鮮于坤。殘孟子而全家滅亡。楊全善。埋字紙而五世登科。李子才。拾字紙而終身顯達。若人能以字紙。或埋於土。或焚於火。或以之而教習後。

文帝全書 卷十二
九
人或以之而播譽親友。自然富貴康寧。多男衍慶。陰報昭昭。毫釐不爽。凡祈嗣者。信受奉行。又曰。吾一日上朝。玉皇上帝。天下諸神。表奏善惡。押送獄司。明彰報應。冊載某人害衆成家。以劫盜報。某人剋取貧民。畧無惻隱。以子孫窮乏報。某人文才合占高選。而輕薄蕩佚。不少自檢。以終身不遂報。某人富而不仁。貪而無饜。傲忽衆人。以疫癘病死報。甚者數人。以王法流死報。又有放無息錢者。活及千人。以子孫顯官報。有散施死者棺斂。病者醫藥。產者餽粥。用心甚廣。但作止所及未洪。以子孫

登第報。如此種種。毫髮不貸。嗟哉世人。沉迷莫悟。善報者百無一二。惡報比比皆然。不知改悔。不生善心。惟計多積錢穀。謂可貽後。豈知罪惡貫盈。反爲己累。惟有社倉一事。可以拯救貧弱。計時豐歉。賤糴貴糶。不取子錢。互有所濟。其利甚廣。行之一族。或給一鄉。自然後亂繁衍。建立功業。享有遐齡。報應不爽。富足有餘。凡欲求嗣。信受奉行。天尊聞說。首勅真人。分身應化。專主嗣籍。鑒察人心。紀錄陰功。昭垂善報。竝勅真人。挽弓挾彈。以兆懸弧。誕子之祥。以滅孤辰。寡宿。天狗等害。以佑善人。真

人肅容再拜天尊。恭對玉几。而說頌曰。慶沐大慈悲。爲
演至真道。道生天地人。生續造化妙。人本非空桑。何以
絕宗祧。惠吉與逆凶。皆由人自造。生已無奉承。死誰卜
宅兆。嗟哉無後人。存歿均堪悼。臣誓廣宣揚。勸凜天尊
教。嗣續各綿延。普免於不孝。真人說是頌已。天尊言。此
經功德不可思議。所在之處。卽有諸天神王。金剛力士。
救苦真人。護法靈官。隨所侍衛。若人誦之。吾當呼召三
精九靈之神。使其六慾不生。三毒消滅。身體康強。子孫
逢吉。天尊說是經已。十方諸真仙衆。合掌讚歎。咸稱善。

哉。善事不作。何以回天。善人無後。何以勸善。天人感通。
如應如響。各各信受。作禮而退。

讚

欽奉真經。矢竭誠恆。遵持十戒。乞慈恩。生德願垂臨。
早賜寧馨。慰我祖親心。

目錄

文帝全書內函卷十三

文帝全書內函卷十三

仁和關槐柱生增輯

太上元始天尊說梓潼帝君應驗經

爾時元始天尊在鬱明天宮玉京山內結成五色采雲
 之蓋領諸天仙衆日月星辰輝煌晃耀山川鬼神拱手
 贊歎咸曰吾等生居混濁塵凡之世希遇天慈廣爲開
 悟梓潼帝君雍容進步再拜帝前長跪而言臣從劫劫
 中萬失本身謫在蜀地念下凡受諸雜劫或生禽獸之
 中或處蠻戎之內富貴有別貧賤有殊受水火刀兵之

文帝全書 卷十三
災。罹。輪。廻。生。死。之。苦。不。有。天。地。日。月。星。辰。毀。謗。教。門。不。敬。三。寶。師。資。父。母。致。令。身。雖。快。樂。不。免。墮。五。塗。三。趣。劫。劫。輪。廻。不。知。覺。悟。見。此。等。人。民。受。報。非。一。今。遇。天。尊。下。臨。放。大。光。明。輝。耀。萬。里。諸。天。仙。衆。暨。諸。天。上。地。下。水。瀆。嶽。司。神。祇。各。居。五。色。琉。璃。之。內。以。聽。宣。說。元。始。天。尊。曰。奇。哉。帝。子。憫。念。衆。生。說。是。因。緣。心。爲。開。悟。陰。陽。遷。迭。日。月。推。移。星。辰。流。伏。地。土。崩。裂。皆。屬。上。天。變。遷。凡。民。受。天。地。中。生。稟。陰。陽。氣。五。行。成。就。二。炁。結。成。不。知。人。身。難。得。中。土。難。生。嫉。妒。貪。淫。未。知。懺。悔。致。使。兵。戈。疫。癘。水。火。災。

殃。悉。皆。由。也。於。時。帝。君。重。白。天。尊。曰。民。受。災。禍。竟。莫。憫。聞。何。以。解。謝。天。尊。凭。几。而。言。汝。居。昊。天。之。佐。齊。太。乙。之。尊。位。高。南。極。德。被。四。方。掌。混。元。之。輪。廻。司。仕。流。之。桂。祿。六。籍。並。考。五。嶽。具。聞。念。此。凡。民。當。爲。救。濟。諸。天。仙。衆。卽。說。頌。曰。於。是。元。始。尊。定。居。琉。璃。內。憫。念。衆。生。惡。三。塗。及。五。趣。茫。茫。不。知。覺。當。同。日。月。晦。不。知。稟。五。行。星。辰。爲。遷。運。時。有。梓。潼。君。從。座。宣。慈。愛。分。身。行。變。化。筆。中。顯。三。昧。並。開。解。禳。門。玉。京。幾。宣。對。下。觀。世。間。人。受。苦。無。耆。艾。不。覺。不。知。悟。今。爲。汝。懺。悔。衆。生。聽。指。迷。五。嶽。無。呈。礙。輪。廻。

文帝全書 卷三
司救苦地獄無馳背。福禍並通傳。吉凶先與暨。好生奉
大道。慈悲爲除害。永開仙教門。依教永無罪。於是天尊
卽說讚曰。桂祿藉汝司。文章爲汝全。若要登仕路。賴汝
爲權衡。善惡是禍福。通達在因緣。把筆爲直書。榮枯豈
偶然。有福必有報。無善亦無偏。諸天稱曰善。何由得昇
遷。於是元始天尊說是經畢。謂梓潼帝君曰。汝居西蜀
之中。鳳凰山上。顯靈凡士。俱有象成。察九億十萬劫之
變化。掌救苦之一職。司禍福於四方。聆吾片辭。以裨寸
善。尙加謹畏。以答慈悲。梓潼帝君卽爲跪謝。上白天尊。

願將行與世。世讀誦。以釋災禍。天尊曰。善哉善哉。誦之
則百福來臻。子孫榮慶。謗之則殃及九祖。禍延乃身。於
是諸天仙衆。卽說偈曰。寂寂玄玄爲大道。昏昏杳杳是
凡愚。今朝幸獲天尊教。凡愚從此免嗔癡。誦畢。諸天仙
衆。梓潼帝君。再拜天顏。作禮而退。信受奉行。
誦是經畢。洗心懺悔曰。七曲慈尊真教主。慈父慈母同
我生。子生聖子皆孝慈。孫繼神孫盡慈孝。一家和氣天
無盡。萬世春臺月有光。慈光普照諸天人。細入微塵滿
天地。我生同得乾坤體。一似文昌始劫時。聖非自聖凡

自凡流浪至今方覺悟願尊七曲慈尊教惟忠惟孝惟慈心不以口業傲神人。不以身業累父母。不以意業欺天地。不以心業禍子孫。願從孝行與陰功。種種力行諸方便。懺贖多生諸罪垢。皈依元皇大慈光。求嗣求祿求生方。不求諸人求諸己。惟我七曲文昌師。歷劫待人存恕法。願放一種如意光。憫念衆生真懺悔。

次發願曰。父母願同長壽果。龜齡鶴髮映慈光。己身願拜大吉祥。仰事俯育無苦惱。子孫願嗅雲崑桂。嘉與子孫同發榮。父慈子孝一家春。光明無負慈尊教。願蒙七

曲親提接。指引登貞選佛場。捨生受生正偏知。盡未來時俱圓滿。

又贊頌曰。桂香殿上仁孝主。教雨周流洗業根。業根化作桂花香。善本種成長壽果。一家骨肉無煩惱。七曲子孫同護持。普願今世與來生。紫雲巖前長得道。步步心。心帝左右。生生世世。天主張骨凡。可換形。可灰一點。真心自金石。

文帝全書內函卷十四之十六

目錄

十四卷聖訓上

文

陰騭文

勸孝文

勸行社倉文

勸敬惜字紙文

懲海廻狂文

戒淫文

覺世文

警世文

戒士子文

三四

文星樓訓文

三一二

鱣壇訓文

一二三四五六

十五卷聖訓中

傳

清河內傳

批荅

荅萬真君進祿嗣秘訣表

十諭彭定求結放生社 批請演女經丹旨表

目序

文帝全書 太上感應篇序 二十六 感應篇後序

玉皇本行集經序

呂祖叅同經序

太微功過格序

記

越巂紫府飛霞洞記

論

孝仙一炁論

三教論

說

孝弟說

跋

玉皇本行集經跋

語錄

廣化一集語錄一則

觀心齋語錄二則

鱣壇語錄十二則

十六卷聖訓下

雜著

勸孝歌

八反歌

勸世百字

真傳品五章

省凡寶訓九則

蕉窗十則

淨明軒訓士十則

十戒

重示十戒

座右十二則

附

羣真語錄

計十二條

方便作種種之陰功。利物利人。修善修福。正直代天行化。慈祥爲國救民。忠主孝親。敬兄信友。或奉眞朝斗。或拜佛念經。報答四恩。廣行三教。濟急如濟涸轍之魚。救危如救密羅之雀。矜孤恤寡。敬老憐貧。措衣食。周道路之饑寒。施棺槨。免屍骸之暴露。家富提攜親戚。歲饑賑濟鄰朋。斗秤須要公平。不可輕出重入。奴僕待之寬恕。豈宜備責苛求。印造經文。創修寺院。捨藥材以拯疾苦。施茶水以解渴煩。或買物而放生。或持齋而戒殺。舉步常看蟲蟻。禁火莫燒山林。點夜燈以照人行。造河船以

濟人渡。勿登山而網禽鳥。勿臨水而毒魚鰕。勿宰耕牛。勿棄字紙。勿謀人之財產。勿妒人之技能。勿淫人之妻女。勿唆人之爭訟。勿壞人之名節。勿破人之婚姻。勿因私讐使人兄弟不和。勿因小利使人父子不睦。勿倚權勢而辱善良。勿恃富豪而欺窮困。善人則親近之。助德行於身心。惡人則遠避之。杜災殃於眉睫。常須隱惡揚善。不可口是心非。剪礙道之荆榛。除當途之瓦石。修數百年崎嶇之路。造千萬人來往之橋。垂訓以格人非。捐資以成人美。作事須尋天理。出言要順人心。見先哲於

羹牆。慎獨知於衾影。諸惡莫作。衆善奉行。永無惡曜。加臨。常有吉神擁護。近報則在自己。遠報則在兒孫。百福駢臻。千祥雲集。豈不從陰騭中得來者哉。

按此文。別本爲國救民句下。有存平等心。擴寬大量。報答四恩。廣行三教。忠敬君王。孝順父母。和好兄弟。信交朋友。或奉真朝斗。或拜佛念經。談道義而化奸頑。講經史而曉愚昧。十二句。又敬老憐貧句下。有舉善薦賢。饒人責己。二句。又勿恃富豪而欺窮困句下。有依本分而致謙恭。守規矩而遵法度。諧和宗族。解

釋冤怨四句。又口是心非句下。有常記有益之語。罔談非禮之言。二句。餘俱同。

勸孝文

今日是元旦。爲人間第一日。吾當說人間第一事。何爲第一事。孝者。百行之原。精而極之。可以參贊化育。故謂之第一事。赤子離了母胎。在孩抱便知得。故謂之第一事。舍此一事。竝無學問。舍此一事。竝無功業。舍此而立言。則爲無本之言。舍此而能功蓋天下。到底不從性分中流出。必作僞以欺國。負本以滅身。天地是孝德結成。

日月是孝光發亮。孝之道言不可得而盡也。爲人子者。事富貴之父母易。事貧賤之父母難。事康健之父母易。事衰老之父母難。事具慶之父母易。事寡獨之父母難。夫富貴之父母。出入有人扶持。居止有人陪從。其願常給。其心常懽。貧賤之父母。捨却白髮。夫妻誰爲言笑。離了青年子媳。莫與追隨。人子一日在外。父母一日孤恹。爲人子者。善體其情。能頃刻離左右也乎。康健之父母。行動可以自如。取攜可以自便。朝作暮息。可以任意訪親問舊。可以娛情。衰老之父母。兒子便是手足。不在面

前。手足欲舉而不能。媳婦便是腹心。不在膝下。腹心有求而不遂。時而欣欣於內。忽然戚戚於懷。爲人子者。善體其情。能頃刻離左右也乎。具慶之父母。日間有以作伴。夜間有以相溫。晝無所事。相與說短論長。夜不成眠。互爲知寒道暖。寡獨之父母。兒女雖有團圓之樂。夫妻已成離別之悲。家庭之內。獨行踽踽。涼涼形影之間。惟有悽悽楚楚。爲人子者。善體其情。能頃刻離左右也乎。嗚呼。試問身從何來。親爲生我之本。孝爲何事。人所自有之心。見我此章而不動心者。非人也。見我此章而不

文海全書 卷十四
墮淚者。非人也。逆子忤媳。見我此章。而不化爲孝子。順媳者。與禽獸何異。人人得而誅之者也。

勸行社倉文

余一日朝玉皇。見天下諸神表奏善惡。奉旨送獄司審定。訖報下某州某縣某人。善衆成家。以劫盜報。某州某人。剋取貧民。畧無惻隱。以子孫窮乏報。一子有文才。令霑文解。檢籍除名。某里某人。富而不仁。貪而不厭。傲忽衆流。以疫癘病死報。其甚者數人。以王法流死報。又有申奏放無息錢者。活及千人。以子孫顯官報。又有散施

死者棺殮。病者醫藥。貧者饋粥。其用心甚廣。但有所止。所及未洪。以子孫登第報。余因是三歎世人。用意迷惑。所見不廣。故風俗日薄。災害歲興。善報者百無一二。惡報者比比皆是。無怪乎賢人君子。不降於世。末劫又作矣。大抵世人。以爲多積錢穀。可以遺後。不知罪惡貫盈。反爲己累。終不覺悟。因是與列仙論及。欲挽回太古之風。使真才實能之士。復生於世者。惟有社倉一事。可以拯救貧弱。甚簡甚便。畧無一人舉而行之。良可憫悼。一鄉一里一巷之人。溫足者不下十家。以上中下爲率。隨

豐儉率具義錢。輪次掌之。收其本錢。勿討其利。自鄉行之鎮。自鎮行之縣。自縣行之州。互有所濟。其利甚廣。非特劫盜疫癘等報。不見於前。行之數年之後。真賢實能輩出。以建功立業。太古氣象。不還於世者。余不信也。有能行之。報應如響。其有逞辯給語。好議論是非。沮壞者。神亦有以察之。付義勇司降傳。富足有餘。正宜行此。

勸敬惜字紙文

士之隸吾籍者。皆自敬重字紙中來。如宋朝王沂公之父。見字紙遺墮。必掇拾以香湯洗晒燒之。一夕夢宣聖。

拊其背曰。汝何敬吾字紙之勤也。憾汝老矣。無可成就。他日當命曾參來汝家受生。顯大門戶。未幾果生一男。遂命名曾。狀元及第。予竊怪今世之人。名爲知書。而不能惜書。視釋老之文。非特萬金之重。於六經之字。有如鴻毛之輕。或以字紙而泥糊。或以藉屏。或以裹褥。或以糊牕。踐踏腳底。或以拭穢。如此之類。不啻相信蕪矣。何釋老之重。而儒教之輕耶。是豈知三教本一。而欲強茲分別爾。况我自有善惡二司。按察施行。以警不敬字紙之類。如平日苦學雞牕。一旦場屋。或以失韻誤字。例爲

有司之黜。終不能一掛名虎榜者。皆神奪其鑑。以示平日不敬字紙之果報也。諸生甘受此報。恬然不知覺悟。甚至子孫不識字。舉家因受其害者。遠則不足以爲戒。姑以近者言之。如瀘州楊百行。坐經文而舉家害癩。昌郡鮮于坤。殘孟子而全家滅亡。果報昭昭。在人耳目。楊全善。埋字紙而五世登科。李子材。拾字紙而一身顯貴。既能顧惜。陰報無差。昨因太上降生之辰。玉帝御太極殿。修文郎顏公葛真人等。三上表而言此事。若能以字紙爲重。或埋之於土。或焚之於火。更能告諭相率力行。

始終不怠。卽消災而降之福。知而不敬。卽奪其福而降之殃。玉旨下。專委吾徧行飛鸞。申明斯事。已曾於成都。就西南道院降榜曉諭矣。又曾滇中降鸞曉諭。卽施。今又降於南安。戒諭普行。若見而知之。知而戒之。顧惜而敬重之。此卽諸生功名之梯級。而父母責望之門也。諸生一誠相感。故吾盡言之。以救士風之頹。庶幾夫子之道。重於泰山。而六經之文。不致爲敝屣。此卽吾之願望也。世人見此。卽將刊刻流傳。遞相告戒。使人人敬之重之。則獲福無量。若不知敬。則殃流後代。可不畏哉。詩曰。

儒門立五典。道釋起三宗。一切閒文字。皆與藏經同。愚痴無見識。多拋糞穢中。墮身千萬劫。永作厠坑蟲。惜字一萬延壽一紀。子貴孫賢綿綿不已。

慾海廻狂文

一作實訓

孽海茫茫。首惡無非色。慾塵寰擾擾。易犯惟有邪淫。拔山蓋世一作礪山帶河之英雄。坐此亡身辱國。繡口錦心之秀士。因茲敗節隳名。始爲一念之差。遂至畢生莫贖。何乃淫風日熾。天理淪亡。以當悲當憾之行。反爲得計。而衆怒衆賤之事。恬不知羞。刊淫詞。談麗色。目注道左。嬌姿。

腸斷簾中窈窕。或貞節。或淑德。可敬可嘉。乃計誘而使無完行。若婢子。若僕妾。宜憐宜憫。竟勢逼而玷。乃終身。旣令親族含羞。尤使子孫蒙垢。嗟嗟。總因心昏氣濁。賢遠佞親。豈知天地難容。神人共憤。或妻女酬償。或子孫受報。絕嗣之墳。無非好色狂徒。妓女之祖。盡是貪花浪子。當富則玉樓削籍。應貴則金榜除名。笞杖徒流大辟。生遭五等之刑。地獄餓鬼畜生。沒受三途之苦。從前恩愛。至此成空。昔日風流。而今安在。與其後悔以無從。胡弗早思而勿犯。謹勸青年烈士。黃卷名流。發覺悟之心。

破色魔之障。芙蓉白面。不過帶肉骷髏。美艷紅妝。乃是殺人利刃。縱對如花如玉之貌。常存若姊若妹之心。未犯者宜防失足。曾行者務早回頭。更祈輾轉流通。迭相化導。必使在在齊歸覺路。人人共出迷津。則大惡既除。衆邪自消。靈臺無滯。世榮垂遠矣。

戒淫文

天道禍淫。其報甚速。人之不畏。夢夢無知。苟行檢之不修。卽災殃之立至。嗟爾有衆。聽予訓言。惟惠迪吉。自古云然。不善降殃。昔人明戒。春秋之淫亂。皆敗國而亡家。

風雅之刺譏。盡鶉奔而鵲逐。故逆理乃自戕其性。而貪淫卽自奪其名。人事一乖。天心盡怒。桂香上苑。非潔己者難遊。杏宴天恩。豈汚名者可得。子泣文衡。嘗垂教示。奈士子止貪半餉之歡。罔惜終身之計。淫人自淫。交手爲市。業報慘報。洗心者誰。吾于二八試闈。每多臨時棄取。一筆勾削。止緣窺彼鄰妻。數字增加。端爲拒茲驛女。欲聞平地之雷。莫起寸心之火。終年潦倒。豈負學苦文高。一世迍邐。悉是踰閑敗節。士人不察于所由。反或怨天而恨地。植來黃甲。只在心田。衣爾紫袍。總由陰隲。棘

闡滿地皆神。文院三場有鬼。惜哉字字珠璣。忽遇燈煤落卷。悵矣篇篇錦繡。無端墨跡污文。此時予實主持。孰謂蒼天無眼。榜發三元。爲有驚神之德。蓮開並蒂。旋聞墜蕊之凶。倘能持正而不邪。自爾名歸而祿得。特頒新諭。咸使聞知。

覺世文

經一作

惟皇降衷。有善無惡。氣拘物蔽。遂漓其天。自暴自棄。實人之罪。心統性情。本至虛靈。聖狂攸分。在茲罔克。仁義禮智。孝弟忠信。孰不培此。寡廉鮮恥。敗名喪節。孰不壞

此驚天事業。震世勲猷。揆厥由來。根基方寸。戰兢惕勵。尚恐不暇。放失怠惰。將何底止。大學明德。專歸誠意。慎獨無欺。方爲自慊。齊治均平。聲教四訖。中庸首章。卽言天命。率性謂道。不可暫離。中和位育。參贊造化。性近習遠。宣聖諄諄。舜蹠分途。孟子亦云。君子德行。自強不息。積善之家。必有餘慶。從逆則凶。惠迪則吉。上帝臨汝。無貳爾心。莊敬日強。安肆日偷。往哲垂訓。炳如日星。嗟爾世人。趨炎附羶。嗜慕攻取。貪婪忿恚。姦僞妒嫉。愛河慾海。終身陷溺。翻雲覆雨。風波頃刻。機械變詐。陰險傾側。

行若鬼蜮。心同蛇蝎。所秉天良。牴牾喪滅。縱存一線。自謂迂拙。事君不忠。事親不孝。兄弟乖離。夫婦瀆狎。朋友嫌隙。如此等人。是謂禽獸。受諸魔障。遭諸惡劫。近報自己。遠報兒孫。田夫織婦。工賈行戶。有能行善。忽然發達。簪纓世家。書香舊族。不善日積。亦遂隕越。上天降鑒。豈在門閥。聖賢福利。雖屬兩途。相因而至。理與數合。得則兼得。失則均失。愚夫鹿鹿。蠅飛紙牕。蛾撲火燈。迷而不悟。前車誰鑒。欲仁仁至。何憚不爲。視聽言動。非禮則勿。日復一日。由勉幾安。淫念毒念。驕心吝心。邪見僻見。幻

想妄想。自皆斷絕。昔孔子曰。毋意毋必。毋固毋我。誠至斯明。抑以先覺。卽釋氏言空諸色相。故無恐怖顛倒夢想。卽老氏言保守三關。斬除三尸。元神結聚。儒家聖人。釋家佛子。道家祖師。總是此心。持而不失。純一無僞。生大智慧。放大光明。得大福利。所願皆遂。疫癘水火。刀兵囚獄。一生不染。生享榮華。歿列仙真。還其固有。未嘗神奇。去其本無。未嘗矯拂。素位而行。不願乎外。心能平等。事皆方便。強恕而行。絜矩之道。敬老憐貧。矜孤恤寡。拯危救急。解紛排難。談論閭閻。攻訐陰私。一切捏謗。口業

莫贖。編造歌詞。著述邪書。縱無確指。受禍最烈。惜字如金。惜米如珠。天物不暴。壽數長延。好是懿德。樂善不倦。化導愚頑。轉移風俗。子孫繩繩。獲福無窮。舍是他求。豈不悲哉。

警世文一

茲值上元運會。衣冠文物重新。吾憫愚氓。溺甚。欽承玉簡。巡行東至秦岱之國。西遊恆嶽之濱。南北周查。已遍。後復返轡嘉陵。况逢新序。屆止。又當五日佳辰。前以諄言示訓。無非挽救人心。富貴貧窮。壽夭多男。乏嗣亨屯。

天心原有定見。至公至恕。至仁嚴密。而不可犯。豈容惡穢相侵。人生如花。在樹能逢。幾度青春。若不力行好事。空拋過隙光陰。立身惟存忠孝。莫負君祿親恩。若逢雙親無恙。承歡菽水。兢兢若逢椿萱兩化。春秋祭奠。關情切莫。欺辱良善。動輒賭勝相爭。須念身體髮膚。寸寸俱是黃金。切莫瞞心自用。欺天何嘗欺人。試看古今報應。本身必及兒孫。楚羽重瞳。蓋世烏江。一劍而傾。更觀王敦背逆。百日梟首。神京孫伯。凌人利己。早已受報冥冥。曹帥江南屠戮。子孫乞丐堪憐。眼前多少豪勝。而今殄

滅絕門。惟勸世人學善。守分無辱多榮。退得一步自穩。
饒他一着何輕。守我清閒淡泊。麤衣蔬食忘形。天地默
爲扶助。神明是敬是尊。更勸讀書士子。莫要坐望尊榮。
第一先除口業。冷言刺語堪驚。持筆戒爲點弄。代人搖
舌鼓唇。得利雖然可快。許多大害隨臨。若還朝夕度日。
心機只用半分。蓋聞古道有戒。曾曰爲富不仁。更有輕
狂佻達。不知天帝懲淫。時或竊窺少女。尋花問柳無根。
不知人非無欲。綳衣綦巾可員。切莫談人閨闈。三三兩
兩成羣。如此自作之孽。天道報應分明。時或衣食不足。

時或貧苦飄零。時或謀爲不遂。時或顛沛忘神。時或刑
戮不免。時或晚遲利名。一切皆由心造。善惡隨之而分。
不信撫心自問。是誰無有天真。多因縱欲敗度。仁義禮
智不存。聖賢許人悔過。天心原自好新。豈肯栽培傾覆。
禍福本自無門。若能改心自訟。立心玉潔冰清。猶如汗
池蓮發。泥滓不得相侵。自能轉禍爲福。百事所作皆成。
堪歎俗風日薄。獸心犬肺人形。是以飛鸞廣勸。只欲驚
醒愚人。但能勉強振拔。自是福祿駢臻。吾今再爲誥誡。
莫負一世聰明。各各時加謹省。前途莫問幾程。神鬼常

臨暗室。願當實力奉行。

警世文二

羣生混混。罔識陰陽。生來天則。付之洋洋。求龜問卜。空勞肺腸。須知大造。禍福相當。若能反躬自責。臨深履薄。恐惶闇室。所爲不道。人前故意誇張。瞞心多作不善。還將志氣揚揚。須知禍隨機伏。絲毫報應昭彰。不必癡心妄想。還當自叩行藏。大道與人爲善。一言一行宜防。勿謂善小不勉。勿謂惡小何傷。譬如積土一簣。自然高比邱岡。前已諄諄示誠。個個藐藐吾章。須信隱微必錄。到

頭分別弱強。不信吾言勸訓。難逃天律煌煌。試看他年得失。始知此日雌黃。若能力行好事。自然轉禍爲祥。文明丁卯佳會。告汝仔細行藏。堂上雙雙白髮。蓬門衣食誰將。吾爲爾等再告。讀書閉戶安康。莫待臨時悲憾。怨天尤地悽惶。此乃藥石要語。諸生當見羹牆。

警世文三

善惡皆在靈府。明明不昧毫釐。孽如身在日中。行止不能逃影。世有不明之事。天無不報之條。人能巧於機謀。天更巧於報應。諸惡莫作。衆善奉行。待父母常加恭敬。

學事業務要精勤。懼王法自然。少禍。謹節儉。何用求人。依本分。永無煩惱。行方便。世代昌榮。戒心性。休生嗔怒。凡作事。三思而行。

戒士子文一

聰明正直而依仁。寧無所擇。寬厚忠信而好義。是用相仍。故憑有感之精忠。曲示無聲之教化。咨爾有衆。聽予格言。蓋聞富貴在天。得失有命。知之者安於自然。而罔或控告。昧之者貪於必得。而每有所求。或謂精神交而夢寐通。或謂祭祀豐而神祇格。宮殿樓觀。務碧瓦之翬

飛。陛闕巖廊。誇朱欄之雕翠。從茲末務。失其本真。不知

進退存亡。係彼三班。

天地水三元也。

四屬。

春夏秋冬四卿也。

行藏用舍。

考茲五部。

文武火雷瘟五部也。

六臺。

南北六司也。此皆上天之神。司人六命者也。

既有

司存。豈容計取。然不可一拘於前定。又不可迷昧於進修。故修身勵行者。天必降之百祥。而反道敗德者。神亦奪其五福。理所著者。人弗知之。是故運數宜符。而反受其殃。災星顯照。而或蒙其吉。造化以之倚伏。神明由是乘除。凡厥儒流。恭行教法。爾等毋欺天。遠毋謂神幽。毋言暗室可欺。毋道明庭不畏。毋凌孤寡。毋侮老成。毋取

不義之財。毋淫非己之色。毋厚結他人而親戚岐路。毋泛交異姓而兄弟鬩牆。毋恃己長。毋攻人短。毋好逸樂。毋縱遊畋。毋損才名。毋挾官貴。毋厚仙釋而薄於父母。毋敬鬼神而慢於師資。苟有負於吾言。端不逃於天憲。故生平俊彥者。累困於場屋。一旦精明者。遽登於鄉書。皆有因緣。固非造次。世之腹誹心謗者。往往得以藉口。人之面譽背毀者。悠悠姑以欺心。彼司文衡而豈得以私。此權祿籍而故先有取。濟濟多士。天其或者臨之。巍巍成功。吾則是之。取爾。宣告中外。咸使聞知。

戒士子文二

今歲取士。不止一端。要在得人。以副衆望。一以陰功孝行爲上。次以處己謙和爲賢。苦學者則酬其勞。高才者則遂其志。傲忽者未免黜落。輕薄者姑示勸懲。文章假之以定其去留。神明司之以公其予奪。人不自省。明示訓言。嘗謂惟士無能。苦學爲能。居貧不富。成名卽富。士無分於貴賤。人切在於勤勞。凡大比先較德業之短長。故有司始定文章之優劣。不可謂前定而不能力學。豈可以宿緣而自怠操修。各雖曰士。初無士行之寸長。身

雖曰儒。徒爲儒服之觀美。不敬天地。不信神明。狎侮老成。輕慢前輩。違逆父母。而逸樂度日。傲忽師長。而放蕩無時。試不遂。則罪有司之不公。榜初張。則謂庸流之濫得。責人者不能責己。議人者所以議天。或恃己之見。而過人之能。或銜己之長。而攻人之短。或矜所學。而忽畧一世。或恃一解。而輕視衆人。立身不正。則以曖昧貪饕爲能。用心不臧。則以機巧變詐爲勝。較短論長。而不從公道。奪彼予此。而弗恤人言。面譽背毀。而求苟合於人。口是心非。而絕不容於物。外貌雖慈祥。徒巧言而美語。

中情多忿狠。好潛賊而陰謀。不擇乎友。而交不義之朋。不和其室。而淫非己之色。舍己田而耘人田。失云多矣。作無益而害有益。損孰甚焉。預鄉薦者。自謂志得意滿。不復進修。入省闈者。則曰功遂名成。直可唾取。恃才傲物。挾長欺孤。常交貴結。援而每誇等流。以隻字片文。而蔑侮同輩。在市井則和合貿易。以覲其所有。遇州縣則鬪合爭訟。以滿其所求。不忠不孝。甘心冒法。而喜爲非禮。非仁。直情徑行。而弗顧。遊畋無度。博奕廢時。耽飲食。而自喪其神。逞威勢。而乃敗於德。致屢困於場屋。安敢

文苑全書 卷十四 七
望於榮華。况三年初無伏案之功。一旦遂萌登科之望。稍無成。直歸於命運。纔有力。專務於禱祈。不知天憲之難逃。深恐人心之愈惑。出處語默之際。天必察之。進退予奪之間。神所司者。豈容倖取。不可計求。苟有行業之可書。奚患飛騰之不遂。爾者營業相傳之後。屢有聲名。儒冠世守之家。反被黜落。不知營業之子。安分讀書。無形顏色。每見儒冠之後。自恃名族。多有驕矜。神明公取。專激勵於輕薄之流。天道左旋。用獎予於純樸之士。若能自悟。晦迹韜光。欲望有成。勞心苦志。曲盡陰功之事。

務存忠孝之心。反乎上古淳樸之風。無流末劫偷薄之俗。自然詩禮傳家。科名復舊。謙和處己。氣象如初。天不負人。人宜力學。凡爲士者。各宜勉之。

戒士子文三

士爲民首。名教當尊。歲月過隙。豈肯暫停。偷安怠惰。虛負一生。反身自問。何惡何因。損人利己。自有冥冥。莫道無報。麻豆之根。隨其肥瘠。生出分明。守貧樂道。士者常情。簞瓢何陋。決踵不驚。空空自如。歌以鳴琴。何必被繡。等作廟牲。守拙自巧。弄假失真。倒河瀉峽。簧鼓空唇。如

文府全書 卷十四 六
此作孽。福豈無門。只須守分。切莫驕矜。才高見屈。豈是無因。或怨貧乏。或嘆後承。或悲晚運。或薄功勳。報以心應。必有淺深。或前富貴。或後零丁。隨善惡以分別。豈顛倒之無憑。爾等成敗。俱有數程。韓信未央。五十買臣。王楊盧駱。擯死相尋。各當努力。靜夜雞鳴。改絃易轍。佩服金銘。遠去非禮。戒爾悖淫。反躬自省。無愧於心。諦聽諦聽。勿負諄諄。爲民者勤儉致富。爲士者自得科名。莫謂神鬼不見不聞。

戒士子文四

蓋聞三教竝列於古今。而儒爲首重。四民咸居乎覆載。乃士屬先尊。故在天則星斗煥有象之文章。在地則川岳鍾無窮之靈秀。守先待後之任。必賴橫經考道之儒。吾謬承玉旨。責在作人。開化四大部洲。徧閱三千世界。中華固禮義之邦。江左尤人文之地。每藉飛鸞。曲申提命。奈人心不古。士習日流。尋章摘句。徒知紫綬金章。幼學壯行。空立鴛班鷺序。伊唔之業。猶且一日暴十日寒。萌蘖之生。不勝斧斤伐。牛羊牧。若時逢大比。便欲高登。抑知文章未入鏡於有司。而德行先難逃於神鑒。或因

一字而誤三場。皆由輕書慢典。或以佳篇而成落卷。盡
爲舍義忘仁。甚至窮年皓首。不能身入宮牆。黑髮青年。
早已名登鬼錄。天鑒不爽。果報昭然。如此頑類。吾深憫
憾。今金陵南境。建我行宮。敞閣之傍。爲爐惜字。維月之
朔。衆已雲騰。月朔之三。又復星聚。焚香而祈。吾之降。出
榜而索我之文。不禁煩言。所當側耳。大約五倫之外。罔
有聖賢六經之中。皆爲明訓。存心則堯兢舜業。涉世則
顏四曾三。已有愧於天。天始不我佑。不可以困窮而怨
天。已有負於人。人始不我親。不可以欺侮而尤人。吾言

不謬。各自書紳。倘身謁吾而心不存吾焉。用此四拜八
拜。以財惜字而意不敬字。烏取爾三分五分。羣當銘心
佩服。吾因傾覆栽培。是諭。

文星樓訓文一

吾爲士大夫一十七世。未嘗不孝父母。不忠君王。不順
師長。不信朋友。不恤貧窮。不護愚魯。不以富貴驕人。不
以才能炫己。不以聲名奔走四方。不以事功侈傲鄉黨。
一惟以謙和柔順。誠敬居心。故能廣積功德。力行善事。
永脫輪迴。直登道岸。今司考校士子功過。以定黜陟。汝

文帝全書 卷十四
等皆知敬我。不知敬身。皆知事我。不知事親。皆知奉我。不知奉君。種種罪愆。士子尤甚。豈不愧於聖人之教乎。吾故命彭定求宣示吾訓。今後士子有志功名。不徒在幾篇文字用力也。不徒在臨考奔營也。不徒在求關求節。以干王法也。不徒在沽名炫美。而結社結盟。以延聲譽也。人心可欺。上天難昧。我已洞察士子之居心矣。早已洞悉士子之行事矣。早已洞見士子之五臟六腑矣。功名之際。得失遲速。不差毫髮。不差時刻。不差斤兩者也。爾等何爲終日讀書。不知書中所說何事。所當行者。

何事。所當戒者何事。惟自爲而不爲人。惟務名而不務實。惟好利而不好義。不知孝弟忠信。不知禮義廉恥。身列衣冠。行同狗彘。捫心清夜。恐亦難安。尙欲妄想功名乎。所以聰明俊秀之子。少秉英姿。至垂老而沉淪淹滯。所以豪華貴介之胄。父兄蔭庇。而沒世不離銅臭。所以單衣勵行。遂至青霄。所以薄福短年。而挽回造化。所以貧窮孤苦。終受榮華。富貴不在己也。死生不在命也。士子各宜猛省吾言。無視爲老生之常談也。彭定求頗能知此道理。我故降乩其家。命其廣勸。此我一片婆心也。

特諭。

文星樓訓文二

吾爲士大夫一十七世。何嘗不以濟人利物爲心。何嘗不以功建名立爲事。何嘗不以爲善去惡爲務。何嘗不以修性養心爲要。何嘗不以敦倫知恥爲先。何嘗不以事君事親爲重。何嘗不以友于兄弟爲宜。何嘗不以夫倡婦隨爲切。何嘗不以朋友切磋爲樂。何嘗不以澹泊寧靜爲安。何嘗不以剛方正直爲性。何嘗不以我子我孫爲本。何嘗不以己財己物爲輕。何嘗不以我死我生

爲大。何嘗不以我榮我辱爲微。何嘗不以我功我罪爲實。何嘗不以人是人非爲緩。何嘗不以我得我失爲數。何嘗不以人得人失爲情。何嘗不以我宗我祖爲急。何嘗不以人宗人祖爲殷。何嘗不以事功德業爲任。何嘗不以性命宗旨爲歸。此所以爲形神俱妙。與道合真也。此所以爲更生永命也。此所以爲九天開化也。此所以爲司祿職貢舉真君也。此所以爲儒者之宗師也。此所以爲道法之尊重也。此所以爲天人之敬仰也。此所以爲千萬世之羽儀也。可爲世人言之。毋不孝父母。不孝者

文彙全書 卷十四
三
罰。毋不忠君王。不忠者誅。毋不尊師長。不尊者責。毋聽信婦人言語。牝雞司晨。惟家之索也。毋燕溺匪人。德行言語可師。乃可交也。毋妄造淫詞。誘人爲惡。壞盡天理也。毋淫人妻女。女子之身。節操爲大也。毋輕信奴僕。造作是非。皆此輩也。毋縱慾房闈。好色者。伐性之本也。毋貪於酒食。哺啜者。肉食可鄙也。毋鞭扑吏民。王政以仁愛爲先也。毋離間親朋。天道以和平爲善也。毋違聖訓。毋逆師言。毋背王章。毋干天律。不可以吾言爲平平無奇。而視爲弁髦也。彭子其力行之。彭子其與人共行之。

乃我降乩之意也。

文星樓訓文三

吾一十七世爲士大夫。未嘗一念驕人。未嘗一念欺人。未嘗一念昧己。未嘗一念縱己。未嘗一念是非顛倒。未嘗一念始終有間。未嘗一念少忽於細。未嘗一念爲惡。不禁於微。可以爲親之孝子。可以爲君之忠臣。可以爲家之祖宗。可以爲國之柱石。可以爲士之師表。可以爲民之父母。可以爲百世之敬仰。可以爲萬法之宗師。可以爲天下之擁戴。可以爲上下之尊崇。可以爲遐邇之

法則。可以爲貴賤之憑依。可以爲幽明之均賴。可以爲男女之儀型也。吾言止矣。一而再。再而三。第一條者。爲功名之指迷也。第二條者。爲德行之格言也。第三條者。爲功成之效驗也。但人不知者。謂彭定求之代筆也。謂彭瓏之潤色也。謂其矯情干譽以邀天報也。謂其是非人以謗同學也。謂其疑神疑佛以涉癡迷也。果有如此言者。吾使其貧賤終身。斥其祿秩。削其壽算。禍其子孫。耗其財物。喪其骨肉。加其疾病也。彭子毋恤人言。毋狗俗情。上天賞罰。豈爾士夫所能主宰者乎。

鱣壇訓文一

學以立命。而盡性爲先。道以修身。而敦倫爲要。故愛敬開仁義之源。孝弟居人倫之首。必敦篤以彰備德之躬。斯叅贊而弘位育之化。建天地而質鬼神。考三王而俟聖哲。卓哉聖道。自古爲昭。慨自士行卑賤。遂至吾道危微。以心性爲分外之謀。假詩書作沽名之計。藐天道而謂虛無。迂聖言以供譁笑。逐淺淺之利。當財不讓於親。圖瑣瑣之名。干榮頓喪其守。方列泮水而氣虐小民。纔登鄉薦而勢驕同輩。出入公門。假勢以恣其所求。往來

市井竭力以營其所欲。明知財本非義。矯曰姑取何妨。亦識德必加修。尙謂將來有待。將一字以破人身家。以一言而刺人幽隱。傲忽師尊。輕欺同志。見善則曰我力未能。逢利則曰惟我所得。罔知名節之重。弗顧行己之污辱。名敗行。不自知其非。喪德損功。猶以爲得計。傷殘骨肉。不思一本之親。輕薄宗親。罔顧同枝之誼。淫非己以傷風化。汚同輩而壞防維。嗚呼。士多類此。可勝道哉。余故假鸞。特申提命。爾等當知生成恩重。孝弟倫深。名節匪輕。廉恥非小。不惰屋漏之行。常抱衾影之慊。非其

義一介不取。如其道萬鍾無辭。從善若決江河。去惡如除臭穢。兢兢乎時。體會子之三省。凜凜乎力效顏氏之四勿。接物常加忠恕。與人亦貴和平。不記怨而圖報。當念德以思酬。閉戶以修性命。策志而究詩書。念宗族之寒微。憫骨肉之微賤。蘊才不露。謙謙昭君子之容。陰善不矜。藹藹成吉人之度。不踰禮而苟合。不犯義以爲非。謹天命之式臨。惕聖言之如在。各依訓誡。免皓首之徒悲。常勉遵行。獲青年而早第。敢有違命。自甘下流。雖吾莫可如何。幸各一爲省惕。

鱣壇訓文二

天地之道。非士不弘。帝王之功。惟儒克任。是以紫綬金
。襲乃屬橫經考道之輩。龍章鳳誥。皆歸秉仁守義之流。
。豈取章句之浮文。應重經綸之實效。夫未能治人。先求
。正己。敦孝弟以肅家修。士之責也。篤名節以整風尚。誰
。之任。與嗟古風之既邈。嘆斯文之日偷。視三綱爲故典。
。目五常作具文。明一經則曰已可鳴世。受一職竟謂儘
。足榮身。呈忠孝之言。不啻披肝瀝膽。考愛敬之實。何異
。色取行違。微有利。雖辱行而不辭。稍有名。卽喪恥而甘

。蹈。愚者安於狹小規模。智者逞其驕矜氣象。恃才以凌
。物。挾勢以欺人。宜其皓首而不第。終老以悲傷也。豈天
。地之有薄待。亦自作之孽宜然。余承帝命。責在淑人。凡
。居儒流。悉吾弟子。故不憚數語之丁寧。以聊作提撕之
。雅誨。爾等靜居當思神聖之式臨。動作務如大賓之在
。側。事親勿圖奉養之虛文。當思竭力事君。勿蹈脂韋之
。故習。必求致身制行於難制之時。存心於難存之地。雖
。造次而不違。卽顛沛而勿失。人之勝於我者。不恥就正
。之功。人之遜於我者。當勤教誨之義。果能遵予所諭。豈

文帝全書 卷四
徒福爾之身。亦必福爾子孫。若違吾諭。豈止禍爾之身。猶將禍爾子孫。各宜凜遵。毋貽後戚。

鱸壇訓文三

天命之性。人物攸分。物得之而秀。人得之而靈。小而事物云爲。大而綱常倫紀。上自天子王侯。下而士民凡庶。普哉至道。允矣惟均。自修道之教失。遂恆性而沉淪。或移情於美色。傷身忘命。或溺意於杯酒。徹晝連昏。或馳情於市利。朝營夕算。或妄干於榮祿。巧取媚迎。微有勢。卽爲弄法。稍有能動。輒驕矜。背義禮而違天地。甘污辱。

以慢鬼神。過而憚改。善而不恆。居身不正。傷風化之本。修德不力。壞秉賦之仁。豈知學以爲己。惟曰計在圖名。欲齊家而治國。必誠正以修身。不敗行於屋漏。常惕志於影衾。入不愧於親長。出無咎於君民。將非義之是戒。惟德性之是尊。凜志於十手十目。持心於不覩不聞。雖窮居不移其節。卽得志不變其行。爾等依吾所告。各立心以正行。更加勤苦。以力學。天必佑汝於陰靈。天道昭昭可怖。衆宜謹慎思循。以學端身。以恕待。人格理以智。宅心以仁。士庶大家振勵。吾道從此復新。

鱣壇訓文四

福善禍淫。災祥雖由天定。逆凶惠吉。臧否實自人爲。一念而善惡攸分。寸心而天人是判。屋漏虧心。神明是鑒。勿謂善小而紀功必載其名。勿謂罪輕而記過盡錄其事。一一不爽。絲絲必報。或在己身而窮年不第。或流後代而落寞凋殘。赫哉斯道。允足欽威。爾等身被儒服。名列士林。責任非淺。擔負不易。當遇物警心。履影惕形。範身於法。言法行。淑躬於地。則天經。父式慈而子式孝。篤和氣於庭幃。兄則友而弟則恭。彰雍睦於家室。勵志而

堯舜其君。感懷而文武其民。仁以展親親之誼。義以正取與之分。身嫻經史。寧曰規矩儀文。性淑詩歌。非謂聲音鐘鼓。當閑性而閑情。必陶品以陶器。舉動可見天心。云爲足通帝鑒。制行潔清。砥奸淫之澆俗。行己廉白。化貪污之靡風。著理道以承先聖之傳。述簡編以開來學之統。是皆性分之所固有。豈非士職之所難辭。若夫設義倉以濟困苦。修橋梁以渡涉溺。行便宜之善事。作隨遇之陰功。施棺木以拯幽滯。廣經義以指愚迷。老弱推以衣食。逸其勞苦。幼穉加之提攜。普爲教誨。雖一事亦

足以爲功。卽一言而何莫非善。在官則陳民之疾苦。在私則揚君之聖明。見善則助人之不及。逢惡則格人之非心。愛生須及草木之生。惜命必至螻蟻之命。危急爲之奠安。窮困爲之拯拔。此乃上天之所首重。亦卽士行之所當爲。旣內有以端其修身之本。外有以廣其造命之功。加之三年伏案。九載螢牕。天爵旣備於乃躬。人爵卽隆於爾室。用是光爾祖宗。以之澤及苗裔。豈非天下之大儒。是卽古今之傑士。凡我弟子。幸各遵行。勿以吾言爲藐藐。當體相勸之殷殷。

鱣壇訓文五

循環者天地自然之運。感報者鬼神實司之權。故爲善降祥。貧賤而膺利達。作惡降殃。富貴而落困窮。命之良也。而災非起於一旦。數亦厚焉。而落寞至於終身。有多男而倏遭天喪。積豐資而忽至徹貧。夫豈栽培之不至。抑亦傾覆之相因。或逆親而傲長。或虐弟而侮兄。或薄族而忘本。或背室而爲非。見財則求敗。百計鬻賣。不顧他人。遇利則巧營。千方富樂。惟圖一己。夫綱常爲重。寧容悖侮。人我一體。豈可逆施。是以天厭其行。轉福而爲

禍神憎其事。易祥以爲殃。或令顛沛於闔門。或令疾患而一世。或令窮年而不亨。或令微賤而乏嗣。赫哉斯道。密矣難逃。予因悲憫。假鸞申誠。爾等勿崇偷薄。當尙朴醇。孝於父母。孝可基福。和於兄弟。和則致祥。勤以立業。免終歲之無資。慎以居身。樂四時之廸吉。無取不義之財。遇困則施。無謀非分之事。見善是守。教子以義。庶保後嗣之遐昌。處室以和。永樂家門之安慶。敬以祀神。勿淫求而肆殺。信以待衆。勿口是而心非。此皆爲人之要道。抑盡居世之常經。爾等一一佩奉。上天自有鑒憐。寧

獨承先而啟後。亦且延命而保身。休甘心於不義。犯天罰之降臨。吾今再行申諭。士庶謹慎遵行。

鱸壇訓文六

祖宗積德。方得生我靈明。衾影無慚。斯能不忝賦畀。形軀雖一物之微。化育實天地之庇。懷胎鞠育。殫父母之劬勞。刑政教誨。賴君師之導誘。兄弟一本。手足情深。夫妻合德。倡隨誼重。提攜賴之同人。扶持需乎友誼。卓哉大道。寧容戕侮。偉矣弘綱。孰逃大範。慨自知能。旣失薄習。日滋子而忤逆父母。不念身從何出。民而謗議君王。

不思身賴孰成。兄弟閔牆。竟忘胞乳之共。夫妻反目。罔計倫化之源。欺侮朋儕。瞞害愚懦。甚至損人利己。害衆成家。見財思得。雖分文不讓。乎貧窮有害。計推卽毫末不念。乎親長貪色。傷其風化。巧取壞其廉隅。視宗族之寒微。漠不動念。覩他人之顛沛。漫不垂憐。爭持恃血氣之剛勇。傲慢仗家勢之富豪。殺生侈費。害物肥身。崇淫祀而戕生。邀妄福而傷命。或誦經讀書。而心口相乖。或談彼論此。而閨幃不諱。種種愆尤。難以筆載。所以人旣失德。天遂降殃。大而刀兵水火。小而身訟官非。重而疾

病饑饉。輕而傷體折財。豈徒然哉。良有因也。然天罰雖嚴。而天心甚恕。今宜痛改前非。力圖後德。修五倫以端身本。除百惡以去身垢。拯貧濟急。惜老矜孤。重物憐命。以培仁心。窮理盡性。以全心德。人心旣改。天運自旋。又何所求不遂。而畏橫逆之難逃也。吾今悼憫。飛鸞告佈。各宜猛省。共回積習。

其本朝百官以忠貞淑慝於宗廟未保西顧時命
而天心之察不宜諒也。惟其才力固足以
其辭意亦足以全志於人心。則亦足以自
其本朝百官以忠貞淑慝於宗廟未保西顧時命
而天心之察不宜諒也。惟其才力固足以
其辭意亦足以全志於人心。則亦足以自



